

Consul Dominicano na Aruba, sra. Joseline Rosario de Rosa

Plasa Juan Pablo Duarte na Aruba ta un “hecho historico”



ORANJESTAD - Consul General di Republica Dominicana na Aruba, sra. Joseline Rosario de Rosa, a trece dilanti su discurso durante e acto oficial di e prome “piek” riba e sitio unda lo ser construi un plasa na honor di e heroe Dominicano, Juan Pablo Duarte.

E diplomatico a destaca e fecha historico di dia 27 di februari 1844, kieren 168 aña pasa, e pueblo Dominicano a declara su mes independiente di e forsa invasor di Haiti. E obra inmortal aki a ser logra danki na e vision, esfuerso y sacrificio di un grupo di hende homber y hende muhe cu a ofrece te hasta nan bida mes pa asina construi un pais.

El a recorda cu e tempo aya su pais no a independisa di e dominio colonial di e potencianan Europeo cu tabata existi den Caribe. El a bisa cu Republica Dominicana a konkista su independencia for di e pais bisiña di Haiti cu na aña 1822 a ocupa un parti di Republica Dominicana, y nan a permanece durante 22 aña riba teritorio Dominicano.

E diplomatico Dominicano a destaca cu apesar di e inestabilidad di e relacion entre Republica Dominicana y Haiti, awendia nan por bisa cu orguyo cu entre e dos gobierno di ambos isla ta existi un bon relacion, danki na e vision di presidente Leonel Fernandez.

Consul Rosario de Rosa a destaca como un “hecho historico” cu na Aruba lo ser construi un plasa na honor di Juan Pablo Du-

arte. El a gradici gobierno di Aruba y su autoridadnan cu a facilita y otorga e area aki pa asina lanta e plasa Juan Pablo Duarte.

“E acto aki di e prome piek pa e construccion di e plasa Juan Pablo Duarte cu lo exhibi un busto di e heroe nacional, tin cune un significativo special pa mas cu 6 mil Dominicano cu ta residencia den e isla aki”, asina e diplomatico a bisa.



Diasabra mainta a tuma un acto di e prome “piek” unda lo ser construi un plasa bou nomber di e heroe Dominicano, Juan Pablo Duarte. E plasa di 40 pa 50 meter cuadra lo ser construi den un area publico situa entre Leeuwenhoekstraat y Hospitalstraat dilanti di hospital bieu na Oranjestad. E ceremonia a conta cu presencia di autoridadnan di nos isla, entre nan Gobernador di Aruba Fredis Refunjol y Prome Minister sr. Mike Eman, ademas di representantenan di cuerpo consular y invitadonan en general.

E plasa aki lo bira un luga special caminda e comunidad Dominicano lo por brinda honor na e tata di nacionalidad Dominicano, Juan Pablo Duarte. □